

Anna Maria Beer-Pally



Ils sis da zercladur 1995 annunzian ils zenns giud clutger dalla parochiala la mort da nossa convischina Anna Maria Beer-Pally da Sedrun.

Oriunda eis ella stada da Sumvitg, nua ch'ella ei naschida ils 12 da settember digl onn 1903. Ses geniturs ein stai Carli Pally e Margreta naschida Maissen. Ina biala e ventireivla affonza ha ella passentau el vitg patern ensemen cun in frar ed ina sora. Suentar haver frequentau las usitadas scolas dil vitg ha ei tucchau alla Anna Maria da serender egl jester e fadigiar il paun da mintgadi e gidar ils dacasa. Aschia ha ella luvrau en differents hotels, denter auter a Lucerna ed a Lugano.

Igl onn 1929 marida ella il giuven fravi Clau Antoni Beer da Sedrun. La letg crescha beinspert ed il Segner benedescha la famiglia cun endisch affons. Ins po aschia cumprender la lavur, ils quitaus e las miserias ch'ina tala gronda famiglia munta per ina mumma. Denton vegn la legria cun tons affons bein era a ver purtau bia sulegl e legria en casa. Sco buna mumma cristiana ha ella educau cun responsablidad ses affons e purtau las cruschs ch'il Segner ha tarmess cun bia pazienza e curascha. Quater affons en giuvens onns sto ella accumpignar sin santeri ed igl onn 1978 piarda ella siu carezau mariu Clau Antoni ella vegliadetgna da 78 onns.

Aschiglioc ei l' Anna Maria stada ina dunna da paucas caneras, da siu persei e da siu fatg. Dapi igl onn 1993 sto ella muort fleivlezia da vegliadetgna star en letg. La buna tgira entras la famiglia lubescha ad ella da star vinavon denter ils ses entochen il di da sia mort ils 6 da zercladur 1995. Sco usitau tier nus accumpogna in numerus pievel ils 8 da zercladur la defuncta al davos viadi terrester sil santeri da s.Vigeli. Ella ruaussi en pasch.